

TEZAU LITURGIC

13 APRILIE

ACATISTUL SF.PREOT-MUCENIC SERGHIE STENKO SF.MUCENICI CHIRIL PRIIMAK ȘI PROHOR BUNCIUK DE LA VASILIEVSK



MOSCOVA, 2000



АКАФИСТ
СВЯТЫМ НОВОМУЧЕНИКАМ
ВАСИЛИЕВСКИМ:
священномученику Сергию и
иже с ним мученикам Прохору
и Кириллу

Взбранное воинство Небеснаго Царя восхвалим, священномученика Сергия богомудраго, и с ним Прохора и Кирилла всехвальных! Тии бо пред безбожными Христа исповедаша и даже до смерти веру сохраниша, темже со дерзновением молятся за род наш. Мы же, воспоминающе подвиги их, со умилением зовем: Радуйтесь, Сергие, Прохоре и Кирилле, мученицы Христовы всехвальнии.

Икос 1

От лет древних лица мученичестии украшение бысть Церкви, и в последняя лета не остави Господь род наш, обаче яви новыя страсотерпцы, иже Бога прославиша и веру утвердиша. Людие же христолюбивии, на подвиги новомучеников взирающе, воспевают: Радуйтесь, свидетели Христовы; радуйтесь, избранницы Божии. Радуйтесь, твердии

адаманты веры; радуйтесь, камене драгии
диадимы церковныя. Радуйтесь, Церкви
красото; радуйтесь, всего мира радование.
Радуйтесь, Сергие, Прохоре и Кирилле,
мученицы Христовы всехвальнии.

Кондак 2

Видяще дерзость безбожных, Сергей пресвитер
ревностию по Бозе возгореся, и даже до смерти
Господа возлюбив, жизни своея не пощаде,
темже и по смерти, купно со Прохором и
Кириллом просвещает умы и сердца верных
вопити Господеви: Аллилуиа.

Икос 2

Разум Божественный имущи мученицы,
прещений не убояшася, мучения же нивчтоже
вменивше, в радости поприще подвига
проидоша. Сего ради слышат от нас пения
сцевая: Радуйтесь, искушения диавольския
препобедившии; радуйтесь, венец правды от
Господа приявшии. Радуйтесь, твердии в вере;
радуйтесь, во уповании не посрамлении.
Радуйтесь, любви Христовой светильницы;
радуйтесь, всеми добродетельми украшении.
Радуйтесь, Сергие, Прохоре и Кирилле,
мученицы Христовы всехвальнии.

Кондак 3

Сила Божия новых мучеников укрепи в подвизех, темже и добропобедницы явишася, наши же и доднесь ходатаи, и веры учителие, и благочестия наставницы; имиже наученнии, Господеви поем: Аллилуиа.

Икос 3

Имуще безбожнии ненависть ко храму Божию, восхотеша той разорити, святыню же уничижити; обаче ничтоже успеха, яко мученицы силою Божиею храм сохраниша, нас же всех подвигоша пети сие: Радуйтесь, храма Божия блюстители; радуйтесь, верных хранители. Радуйтесь, безбожных ниспровержение; радуйтесь, верных крепкое утверждение. Радуйтесь, света Христова свечи; радуйтесь, мрака безбожного отгнатели. Радуйтесь, Сергие, Прохоре и Кирилле, мученицы Христовы всехвальнии.

Кондак 4

Буря богоборчества на землю нашу прииде, многех же от пути правого отврати, обаче мученицы пред новым Ваалом колена не преклониша, имени же Христова не отвергошася, верно поюща Богови: Аллилуиа.

Икос 4

Слыша Сергей, добрый пастырь сый, яко людие
гладом гибнут, восхоте помощи тем, обаче
святыни церковныя на поругание безбожных не
отдаде и, велия мучения приим, ныне во славе
пребывает купно со сподвижники своими
Кириллом и Прохором, от нас слышаще сия:
Радуйтесь, святителя Тихона послушатели
вернии; радуйтесь, священномученика
Прокопия ученицы. Радуйтесь, людем гладным
помогающим; радуйтесь, от глада духовнаго
избавляющим. Радуйтесь, Николаевского края
красото; радуйтесь, всея земли полуденныя
украшение. Радуйтесь, Сергие, Прохоре и
Кирилле, мученицы Христовы всехвальнии.

Кондак 5

Боготечную звезду яви Господь вас,
прехвальнии мученицы, мрак неведения
разгоняющую, верных же наставляющую ко
истинному Богопочитанию, яко да вси людие
воспоют Богови: Аллилуиа.

Икос 5

Видеша безбожницы твердую веру вашу,
потщашася сокрушити ту мученьми, обаче
посрамишася; мученицы же, силою Христа
Господа укрепляемии, искушений пламень

проидоша, и, в покой изведеннии, слышат от всех верных похваления сицевая: Радуйтесь, огонь и воду безбоязненно прошедши; радуйтесь, муки и страдания за Христа приемши. Радуйтесь, деревья райския многоплодные; радуйтесь, насажденнии Господем в вертограде небеснем. Радуйтесь, источники воды живыя; радуйтесь, напоители всех жаждущих. Радуйтесь, Сергие, Прохоре и Кирилле, мученицы Христовы всехвальнии.

Кондак 6

Проповедницы веры и нечестия обличители явишася мученицы новии, не токмо веси Василиевския, но и всея земли нашея людей подвижающии, презирающе искушения, верно Господеви служить, выну вопиюще Тому: Аллилуиа.

Икос 6

Возсиявый во мраке мучений Господь укрепи Сергия священнаго, яко да принесет жертву чисту и непорочну, себе самага священнодействуя, страдальцев же иных укрепляюще. Темже мученицы заклание явишася приятное Богови, нас же всех подвигоша пети святым тако: Радуйтесь, храмы Христовы одушевленнии; радуйтесь, жертвы Богоприятнии. Радуйтесь, заклания вольнии;

радуйтесь, всесожжения самохотнии. Радуйтесь, кровь свою за Христа пролившии; радуйтесь, Кровию Христовою укрепленнии. Радуйтесь, Сергие, Прохоре и Кирилле.

Кондак 7

Хотяй всем человеком спастися и в разум истины приити, Христос яви сокровище велие Церкви Своей святей, честныя мощи мучеников новых, Сергия, Прохора и Кирилла. Вернии же, останки мученичестии лобзающе, радостно поют Господеви: Аллилуиа.

Икос 7

Новаго Завета Кровию омытии, своею же кровию украсившии ризы своя, мученицы новии предстоят ныне Престолу Господа славы, слышаще от нас пения таковая: Радуйтесь, ветхость греховную победившии; радуйтесь, во обновленной жизни живущии. Радуйтесь, от временных болезненно изшедшии; радуйтесь, к вечным радостно пресельшиися. Радуйтесь, временными муками блаженство вечное обретшии; радуйтесь, от привременных к вечным наставницы. Радуйтесь, Сергие, Прохоре и Кирилле, мученицы Христовы всехвальнии.

Кондак 8

Странное чудо видим и преславное, яко человецы немощнии злобу диавольскую превозмогоша, силою же Божиею не токмо души своя сохраниша, но и храм рукотворенный соблюдоша, яко да в том собраннии вернии всегда воспевают: Аллилуиа.

Икос 8

Весь мир мучеников воспевает, обаче сродницы их в веси Василиевстей лика похвальнаго являются первостоятели, воспевающе тако: Радуйтесь, сродницы наши преславнии; радуйтесь, хранителие веси вашей. Радуйтесь, о присных вам молитвенницы; радуйтесь, о ближних ваших ходатаи. Радуйтесь, всего мира красото; радуйтесь, веси вашей украшение Богодарованное. Радуйтесь, Сергие, Прохоре и Кирилле, мученицы Христовы всехвальнии.

Кондак 9

Всякое естество человеческое удивися великому мучеников дерзновению, яко тии мучений не убояшая, и лютых безбожников посрамиша, посреде мучений непоколеблеми бывше, Господеви поюще победную песнь: Аллилуиа.

Икос 9

Ветии сладкогласнии являются мученицы новии, Господа проповедающие и к жизни христианстей наставляющие; того ради мы поем им любовь: Радуйтесь, Царства Божия проповедницы; радуйтесь, Евангелия изряднии провозвестницы. Радуйтесь, Суда грядущаго возвестители; радуйтесь, неверия обличители. Радуйтесь, риторы богогласнейшии; радуйтесь, учителя веры непреложнии. Радуйтесь, Сергие, Прохоре и Кирилле, мученицы Христовы всехвальнии.

Кондак 10

Спасти хотяй мир, яви Господь в последняя лета мучеников Своих новых, тии же кровию своею Истину Христову засвидетельствовавше, верных научиша воспевати Богови: Аллилуиа.

Икос 10

Стена тверда и покров являются молитвы мучеников всем любителем благолепия церковнаго; ихже молитвами, Господи, и храмы душ наших соблюди, да в чистоте и правде восхвалим чудных подвижников тако: Радуйтесь, на камени веры утверждении; радуйтесь, веру нерушиму сохраняющие. Радуйтесь, надеждою несумненною

ограждении; радуйтесь, упование верным дарующии. Радуйтесь, любовью Христовою преукрашении; радуйтесь, любовь в сердцах наших возжигающий. Радуйтесь, Сергие, Прохоре и Кирилле, мученицы Христовы всехвальнии.

Кондак 11

Пение ангельское слышите ныне, Сергие, Прохоре и Кирилле, и в небесней славе пребывающе, со всеми небесными силами славословите Христа, и нас на земли подвизаете вопити непрестанно: Аллилуиа.

Икос 11

Светом Христовым просвещении, явистесь светильницы миру всему, достохвальнии, мрак неведения разгоняющий, верных же ко спасению путеводствующии. Сего ради слышите от нас умильные хвалы: Радуйтесь, лучи истинного Солнца правды; радуйтесь, силою Божиею пожигающий неправду. Радуйтесь, светильницы не вечернего света; радуйтесь, во мраке жития живущих освещающий. Радуйтесь, яко свет Христов вас светло просвети; радуйтесь, яко сияние подвигов ваших души наша освещает. Радуйтесь, Сергие, Прохоре и Кирилле, мученицы Христовы всехвальнии.

Кондак 12

Благодать Божия сохрани мощи ваша, мученицы блаженнии, во свидетельство чадам вашим, яко кости праведных воистину процветают; сего ради вас, яко живых сущих с нами почитающе, Господеви верно покланяемся, православно воспевающе Тому: Аллилуиа.

Икос 12

Поюще подвиги ваша и злострадания, еще же и славу воспевающе, уповаем на силу молитв ваших, достоблаженнии Сергие, Прохоре и Кирилле, дивнии сродницы наши. Приимите же от уст наших словеса похвальная сия: Радуйтесь, древним мученикам равнии; радуйтесь, подвижницы славнии. Радуйтесь, страстотерпцы терпеливодушнии; радуйтесь, искуснии врачеве душ и телес. Радуйтесь, молитвы наша Господеви приносящи; радуйтесь, о сродниках ваших присно молящися. Радуйтесь, Сергие, Прохоре и Кирилле, мученицы Христовы всехвальнии.

Кондак 13

О, прехвальнии угодницы Христовы, священномучениче Сергие с мученики Прохором и Кириллом, добрый подвиг совершившии и веру соблюдшии, того ради и на небесех в

вечней славе Господеви предстоящий! Не оставите нас, сродников ваших, молитвами своими, испросите нам у Бога душ спасения и всех, яже ко спасению потребных! Умолите Творца, да сподобит и нас купно с вами присно воспевати Господеви песнь радования: Аллилуиа!

Молитва

О, святии мученицы, Сергие, Прохоре и Кирилле, теплии о нас ходатаи и усерднии пред Богом молитвенницы! Во умилении сердец предстояще пред святым образом вашим [или: честными мощами вашими], смиренно молимся: услышите нас, грешных и недостойных, обремененных страстями и лению отягченных! Явите нам милости своя, воздвигните нас молитвами вашими из глубины греховныя, просветите ум, умягчите сердце, умирите вражду и ненависть искорените. Молите милостиваго Господа, да покрывает множество наших грехов и в добродетели нас укрепит. Да соблюдет Церковь Свою Святую в мире, сохраняюще Ю от расколов, ересей и соблазнов. Да дарует стране нашей мир и благоденствие. Всех же нас да покрывает Бог всесильною десницею Своею, соблюдающе от всякаго зла, да оградит нас Ангелы Своими во вся дни жизни нашея, во еже неосужденно

преити коемуждо поприще свое, и по исходе от жития сего предстати нам Престолу Господа Славы, идеже купно с вами и всеми святыми славити пресвятое и достопокланяемое имя Отца и Сына и Святаго Духа во веки веков. Аминь.

